

ЁШЛАР МАСАЛАЛАРИ ХАЛҚ ДЕПУТАТЛАРИ ВИЛОЯТ КЕНГАШИ ВА ШАҲАР-ТУМАН КЕНГАШЛАРИНИНГ ҚЎШМА СЕССИЯСИ КУН ТАРТИБИНИ ТАШКИЛ ЭТДИ

21 май куни Халқ депутатлари Фарғона вилоят Кенгаши ва шаҳар-туман Кенгашларининг қўшма сессияси бўлиб ўтди.

Видеоконференцалоқа тарзида ўтказилган қўшма сессияда вилоят ҳокими Хайрулло Бозоров, Олий Мажлис Сенатининг Ёшлар, маданият ва спорт масалалари қўмитаси раиси Бахтиёр Сайфуллаев, вилоятдан сайланган Олий Мажлис Сенати аъзолари, халқ депутатлари вилоят Кенгаши депутатлари, Сенат ҳузуридаги Ёшлар парламенти аъзолари, вилоят ҳокимининг ўринбосарлари, вилоят секторлари раҳбарлари, кун тартибига киритилган масалага алоқадор давлат ва жамоат ташкилотлари раҳбарлари ҳамда оммавий ахборот воситалари вакиллари иштирок этдилар.

Қўшма сессия кун тартибидан ёшлар тадбиркорлигини қўллаб-қувватлаш, уларни касб-хунарга ўқитиш орқали бандлигини таъминлаш, шунингдек, ёшларнинг бўш вақтини мазмунли ташкил этиш борасида вилоятда амалга оширилаётган ишлар ҳамда ёшлар бандлигини таъминлаш ва бўш вақтини мазмунли ташкил этиш бўйича Фарғона вилояти чегараолди туманларида амалга оширилаётган ишларнинг ҳолати масалалари ўрин олди.

Дастлаб ёшларнинг бўш вақтини мазмунли ташкил этиш борасида вилоятда амалга оширилаётган ишлар юзасидан вилоят ҳокимининг ёшлар сиёсати, ижтимоий ривожлантириш ва маънавий-маърифий ишлар бўйича ўринбосари Файзулло Қосимовнинг ахбороти тингланди.

Маърузачи бугунги кунда асосий эътиборни “Ёшлар дафтари”га киритилган, ишлаш истагида бўлган 81037 нафар ёшларнинг бандлигини таъминлашга қаратилаётганлиги, шу мақсадда, 2021 йил биринчи чорақда 16770 нафар, иккинчи чорақда 35767 нафар, учинчи чорақда қолган 28500 нафар ёшларни даромад келтирадиган соҳаларда банд қилиш белгилаб олинганлигини маълум қилди.

Жорий йилнинг 17-21 май кунлари Олий Мажлис Сенатининг Ёшлар, маданият ва спорт масалалари қўмитаси ишчи гуруҳи томонидан Ёшлар бандлигини таъминлаш ва бўш вақтини мазмунли ташкил этиш бўйича белгиланган вазифаларнинг вилоятнинг чегараолди туманларида амалга оширилиш ҳолати ўрганилди.

Қўшма сессияда ушбу ўрганиш натижалари, аниқланган камчиликлар, уларни бартараф этиш чоралари, шунингдек, келгусида амалга оширилиши лозим бўлган ишлар юзасидан Олий Мажлис Сенатининг Ёшлар, маданият ва спорт масалалари қўмитаси раиси, ишчи гуруҳ раҳбари Бахтиёр Сайфуллаев маъруза қилди.

Шундан сўнг кун тартибидаги масалалар бўйича шаҳар-туман студияларидан қатнашган секторлар раҳбарлари билан онлайн муҳокамалар ўтказилиб, бундан буён ёшлар бандлигини таъминлаш, уларни қўллаб-қувватлаш масалалари бўйича аниқ мақсад ва режа асосида иш ташкил этиш бўйича келишиб олинди.

Сессияда кўриб чиқилган масалалар юзасидан Халқ депутатлари вилоят кенгашининг тегишли қарорлари қабул қилинди.